

Liujcouh:

Caez Gwn Aen Faengxmeh 198 Gaen

Ndwen 6 ngoenz 7, ngoenz haenx dwg ciet ndwenngux co-ngux. Liujcouh Si Yungzsuij Myauzcuz Swciyen Mung'vuh Mbanjmyauz banh aen hozdung "haeux bak ranz faengx cien vunz", guh aen faengxmeh 198 gaen, yungh fwnz coemh cawj 24 diemj cung le, hawj bouxhek caez gwn mbouj aeu cienz, caezcaemh geiqniemh Giz Yenz.

Ciuq cam rox, aen faengxmeh neix raez 1.39 mij, gvangq 0.90 mij, sang 0.39 mij, yungh liuh gungh 198 gaen, yungh rongfaengx 3600 lai mbaw. Liuh ndaw faengx cungj dwg gij gwn mbanjbya Yungzsuij, miz bit Yungzsuij, raethom, duhheu, haeuxcid nding, lwglaed daengj, yungh 2 diemj lai cung suek baenz.

(Liu Swjyenh/廖子渊)



▲ Gyoengq vunz caez gwn aen faengxmeh 198 gaen.



▲ Gyoengq vunz ram faengxmeh cunzyouz.



▲ Dahsau Yauzcuz cingq mbaet mbawcaz.

Yungzanh: "Muengzchungq" Nyaengq Mbaet Mbawcaz

Ndwen 6 ngoenz 6 dwg "muengzchungq" ndaw ngeihcib seiq cietheiq. Cietheiq "muengzchungq", Yungzanh Yen ngoenz ndat gvaq ngoenz, fwn raemx ngoenz lai gvaq ngoenz, cingq dwg mwh gocaz maj ndaej mwnhoengh. Beixnuengx Yauzcuz Yungzanh Yen Banjlantz Cin Dunghlingj Cunh ciengj dawz seiz guhhong mbaet mbawcaz, ceng'aeu sou ndaej lai.

Aen cunh neix dwg dieg comzyouq Yauzcuz, vunzlai gungzhoj lai, dangdieg haijbaz sang, dienheiq hab gocaz sengmaj, baenz mbawcaz ndei, ndaej daengz gyoengq bouxcawx gyaenz, ndaem caz, mbaet caz baenz diuzroen youqgaenj beixnuengx Yauzcuz dangdieg vut gungz baenz miz ndawde diuz ndeu. Youq mwh vut gungz gunggeng, dangdieg cwngfuj sonyinx caeuq bangcoh vunzlai gungzhoj Yauzcuz, laebdin gijndei dienheiq caeuq deihleix dangdieg, ndaem gocaz, yinx haeuj gocaz ndei, son'gyauq dinfwngz gyagoeng mbawcaz, daezsang gij gyaqcienz mbawcaz, hawj vunzlai gungzhoj laisou, bangrengz vunzlai gungzhoj Yauzcuz dangdieg vaiqdi vut gungz.

(Danz Gajjhingh Cinz Ginghoz/谭凯兴 覃庆和)

Lungzswng: Mbanjcuengh Angqgvaq Ciet Roigyaj

Ndwen 6 ngoenz 8, Lungzswng Gak Cuz Swciyen Lungzciz Cin Bingzanh Cunh banh ciet roigyaj, beixnuengx Bouxcuengh dangdieg youq gwnz nazmbaeklae guh minzsuz cunzyouz, haiguh roigyaj, suenggeng, ndaem gyaj daengj hongnaz, hawj gyoengq bouxhek ndaw guek rog guek daeuj caeuqfaenh hozdung haenx yawj dwk lwgda cungj mbouj yaep.

(Banh Cisiengz Vuz Cencen/潘志祥 吴倩茜)



▲ Beixnuengx Bouxcuengh youq gyang naz guh hongnaz.

Denzyangz Mbanjhanghmou 19 Aen Doih Doxdax Ruzlungz



▲ Doxdax yienhciengz ndeiyawj raixcaix.

Ndwen 6 ngoenz 9 dwg liggaueq ndwenngux cocaet, Denzyangz Yen Denzcouh Cin Lungzbingz Cunh Mbanjhanghmou youq donh dah Yougyangh banh aen hozdung doxdax ruzlungz, daengx mbanj cujcz 10 aen doih bouxsai, 9 aen doih mehmbwk gungh 19 aen doih caeuqfaenh doxdax ceng mingz daeuz ngeih sam, doxdax hozdung ndeiyawj raixcaix, mboujdan cauh'ok gij heiqfaenh daengx mbanj doxgiet huzndei, gaenxmaenx baenaj, youh ndaej fungfouq gij ndwenngoenz diyyuz vwnzva gyoengq vunzmbanj.

(Vangz Gozsun/黄国顺)